



明詩正聲卷五十九 七言絕句八

廣陵

盧純學

選輯

江一夔

校閱

遼西歌

茅溱

裨將分屯三十營
營營火砲震天鳴
縱教胡馬如征鴈
不敢銜蘆過北平

汪司馬東巡歌

曉渡滹沱雪滿河
轅門鞞鼓襍鏡歌
為傳今日新司馬
原是南征舊伏波

塞上立秋夜

上谷山川帶朔州尋常溽暑似高秋那堪今夜
涼飈發拆盡歸心攬敝裘

同陸無從憩法海寺

幾處看花路欲迷尋僧又過竹林西青山盡日
無人到雙樹陰中一鳥啼

從軍行

盧澐

年少能開二石弓受降城下獵秋風酒酣直突
烏孫壘斬却明王獨報功

陳太史見示新作

江一夔

手握新詩一卷開忽驚天上月明來夜深不必
燒華燭無數驪珠照酒杯

度淮陰

千里黃河一棹來清淮亭下暫徘徊枚乘去後
枚臯死千載空懷作賦才

射陽湖

射陽湖上度孤舟荷葉荷花水面浮樹底清尊
殘日影十年重對故園秋

看山

攢石為山萬片青
昆侖秋色落空庭
洞中乍有清泉出
流到杯前酒半醒

雪中聞鴈

文鎮

朔風昨夜度桑乾
鴈叫同雲雪滿灘
村巷共傳千里瑞
江天誰惜羽毛寒

病起

三月閉門萬事空
却憐秋在山寺中
走向山僧問消息
滿林黃葉數聲鴻

過邯鄲縣

尹耕

秦兵百萬氣連雲
屋瓦邯鄲震欲焚
千載尚留城市在
土人爭說信陵君

蔚州歌

南山陡絕石門峪
西嶺斜通亂石灘
敢勇近聞堪一戰
不教容易近長安

其二

井陘荒城日易曛
阜平山下剩黃雲
羯奴飲馬桑乾水
愁殺關南義勇軍

青樓詞

盧柟

百尺高樓掛彩烟
錦箏銀甲亂哀絃
夕陽西下簾深卷
望見西江萬里船

少年行

長安俠客多少年
醉歌擊筑南山邊
相逢不避魯勾踐
一夜擲盧得萬錢

橫塘曲

胡姬嬌少坐銀牀
玉臂纖腰促酒觴
醉殺春風無限恨
烟花三月繞橫塘

過濮上李伯承山房

宋賢

短髮蕭騷老布衣
天涯行遍故人稀
于今再入青蓮館
坐看堦前黃葉飛

其二

掉臂行吟與世違
青山家在未能歸
狂來倚劍憑高望
天外冥鴻空自飛

其三

淡烟籠樹遠相依
樓閣空中列翠微
讀罷黃庭山月落
白雲常繞画簷飛

塞下曲送王山人遊邊

胡應麟

平沙一望隴雲開
玉笛飛聲夜轉哀
萬里朔風吹不斷
梅花齊落李陵臺

其二

戰馬驕騰大漠間
遙看虜陣薄陰山
橫戈不待嫖姚令
生縛樓蘭入漢關

小憩長春圃作

谷口雲深護翠巒
科頭長日對盤桓
一聲山鳥夕陽墮
滿榻長松生夏寒

病宮人

馬熒

伏枕經年罷合歡
玉環無色獨憑欄
自憐未竊長生藥
空對秋光夜夜寒

送劉太常左遷大梁

三年典禮侍明光
薄譴憐君且大梁
一出都門便惆悵
官河南岸柳條長

秣陵道中

羅治

立馬江干落日黃
秣陵秋色正蒼茫
傷心一片離離草
六代無人空自芳

茗溪

蔡學用

千峰不盡白雲西
一水遙來下碧溪
流到人間知幾曲
却憐歸路轉相迷

曲江秋晚懷熊世貞

吳錕

亂山蒼翠帶斜曛
瓜步空洲獨憶君
滿岸芙蓉搖落盡
空餘一片暮江雲

邗江晚思

一片孤帆白鳥雙
夕陽斜影入船窓
鄉心暗逐歸雲去
度盡邗江又楚江

南郊

李德學

竹林深處兩三家
門外新潮浸浦沙
昨夜月明齊下網
得魚無數任人賒

其二

遠嶼青青綠樹低
層樓上與白雲齊
閉門盡日無人到
向晚惟容鳥雀栖

塞下曲

張僑

憶自從軍二十年
寶刀三易鐵衣穿
戰酣直向重圍出
不遣胡兒匹馬旋

暮抵河間宿寺中懷江別駕 卓宗茂
嚴城角動夜烏啼影落長河片月低獨扣禪扉
春寂寞美人應在繚垣西

宮詞

柳應芳

十五蛾眉畫未工傷心紈扇奪秋風三千寵內
身無預空繫昭陽舊守宮

寄巴陵周啓孝

長安十日雨冥冥一夕愁心到洞庭俠骨別來
消欲盡空餘雙鬢向人青

采石歌吊李白

顧冶

蛾眉亭子壓江隈隔岸秋山八字開總是玉顏
能作妬入宮容易使人哀

春曉夢聞蕭却贈秦八侍史范瑄

夢落簫聲迸玉寒依微殘月半闌干醒來記得
春宵約恨殺秦家路渺漫

荆溪曲

荷鍾新移百合花檀心一點暈輕霞靈根細細
煨松火織手擎來換客茶

其二

携筐結伴豔雙雙
採萼歌翻越女腔
惱殺啼鴉芳緒亂
燭花空自濕瑀窓

秋怨

瑤屏銀燭濕青樓
翠袖黃花冷素秋
怕殺當盃齊唱曲
打頭一句是涼州

下東壩固城湖遇黃容彈琴調當鑪者

荇蒂波鱗綠旋鋪
橫琴水上響秋湖
文君暎柳窺人立
拚得驕裘擲酒鑪

代內送別

何良臣

侍筵江淮客十年
君今北上妾南旋
此行骨肉憑誰是
馬首風塵好自憐

秋日村居荅張孺愿

黃景綦

荇草萍花野水澄
菰蘆深處露華凝
畫船明月無蕭鼓
夜夜湖頭唱采菱

別高姬

三疊歌停日漸低
行行心折大江西
懸知今夜相思夢
半遶章臺半馬蹄

哭舅氏王司寇元美

曹昌先

明月西沈北斗昏倒傾雲漢裂崑崙不知真宰
成何意欲倩巫咸扣帝閣

其二

青門車馬錢歸人乞得黃冠物外身一曲鑑湖
清淺甚秋來那許再垂綸

其三

入宮誰不妬娥眉垂老猶為世路疑腸斷薊門
烏鳥淚心傷故國鶴鴒詩

其四

曾因家難歌哀鳳再為君恩起臥龍身似白雲
長自在任人看澹復看濃

其五

醉唱柴棗舊挽歌蕭蕭禿髮柰愁何東籬盡日
沈冥臥猶恨生前酒不多

其六

好客千金舊橐捐晚來翻結賣文緣不知湖海
褰衣士更向何人索酒錢

其七

潯陽千里恨春潮一去麻姑信息遙
華表縱教歸白鶴也應城市半蕭條

其八

海內紛紛走素車生芻日日哭郊墟
定知宿草三年后猶有門人願結廬

其九

病餘魂夢至三弁恨比西州更不堪
春入捻知花事好看花誰復是羊曇

少年行

六郡良家三輔豪千金鞍馬百金刀
也知侯印尋常事不分秋來太白高

其二

長安兄弟舊知名半是期門半射聲
醉就胡姬爐畔宿明朝齊赴受降城

哭海中丞

吳運嘉

俄驚星隕失夔龍夢斷羅浮路萬重
不盡忠魂何處託青天風雨泣芙蓉

游仙詞

松窓半掩一虛亭
几上瑤函玉字經
滿地金光雲氣冷
蒼藤長護石花青

送鄭大司馬經畧西陲

黃輝

節鉞西征戰血腥
即看天北墮妖星
憑君倒挽黃河水
洗出皋蘭一片青

其二

六傳平驅太白西
隴城千里黑雲低
南山火速收飛將
莫遣胡雛傍塞啼

其三

北斗西杓拂劔寒
五原秋色馬頭看
怪來易水高颺急
歌罷真成髮指冠

舟中懷包參軍

李德繼

極目空山萬頃秋
誰家長笛一聲愁
故人家在桃花渡
船到門前月滿樓

賦得妾還君扇

金朗

團扇當年比合歡
秋風今日擲君前
無緣得似雲間月
常向房櫳夜夜圓

經寇巨源家

細草芊芊白板扉長負少婦淚沾衣
君來莫問他夫壻十載燕中客未歸

雪後送少司馬石公出塞

穆光胤

六飛北駕擁黃雲霜戟排空望不分
細柳營中占氣色漢家今有大將軍

送歐楨伯先生還嶺南

孫朗

聞道羅浮四百峰青天萬疊玉夫容
到來蘭若山中梵何似長安禁裡鐘

其二

黃花偏傍客筵新歸計還憐宦橐負
莫向江干問離別孤城風雨更愁人

寄陸子雝

浮雲何處越王臺川上寒潮自往迴
剖盡江魚書不見夜深孤閣鴈還來

懷徐宗曾

蕭譽

西風吹雨送離歌北闕含情柰爾何
五馬銜霜霜似月憶君遙渡古黃河

王行甫書來許秋日見訪愴然憶之
羨君日日采江蘼猶憶山中五色芝
匹馬新秋應不厭人生能得幾相知

遲張比孟不至

謝紹訥

空江望裏夕陽孤天外歸舟乍有無
幾度思君君不至一春風雨濕薜蘿

秋日聽陳明卿彈秋鴻

倪光胤

響入朱絃片月秋數聲孤鴈下西樓
蕭蕭落木寒雲色併作他鄉一段愁

有感

牢落風塵萬里遊黃金散盡敝貂裘
空餘二十年前劍夜夜寒光射斗牛

錢伯陽自樵李再至余携具小集

風雨瀟瀟入漏長各憐踪跡寄他鄉
高歌慷慨俱知己斗酒銷殘五夜霜

青樓曲

韓尼生

綠髻斜飛妬楚雲羅裙色與石榴分
玉簫纔學秦樓曲吹下天邊彩鳳羣

芳草

施復蘇

芳草萋萋入望賒三年遊子未還家一簾疎雨
蒼山暮又過江南二月花

登海虞城樓

落木蕭蕭鳥亂啼海虞城上白雲低馮闌細數
南飛鴈欲寄家書隔水西

雪中懷友

江震祚

梅花開遍曲欄干短徑陰陰落日寒萬頃朔雲
飛作雪風吹一夜滿長干

客居與友人夜酌

高齊日落楚天寒片月流光墮碧闌夜半更呼
江上酒醉將長鋏為君彈

烟波閣為張孺宗題

楊柳蒼蒼白芷香青烟不動釣絲長尊前一片
澄湖色都入西窓汎夕陽

雨夜

丘陵

寒雨浮空夜色遙虛檐飛瀑響瀟瀟傷心人在
危樓外獨自殘燈對寂寥

桃花塢

芳郊晴日草萋萋
千樹桃花一鳥啼
無數落紅隨水去
又分春色入城西

明詩正聲卷五十九

明詩正聲卷六十

七言絕句九

廣陵

盧純學

選輯

江一夔

校閱

閨秀

春歸

孟淑卿

落盡棠梨水拍堤
萋萋芳草望中迷
無情最是枝頭鳥
不管人愁只管啼

秋夜

荳花雨過晚生涼
林館孤眠怯夜長
自是愁多

不成寐非緣金井有啼螿

席上贈妓

石榴裙子稱纖腰
唱歌新聲喚玉簫
背立東風偷拭淚
為誰腸斷為誰嬌

賣廢宅詩

茅氏

壁有蒼苔甑有塵
家園一旦屬西隣
傷心怕見門前柳
明日猶如陌路人

竹枝詞

朱靜菴

西子湖頭賣酒家
春風搖蕩酒旗斜
行人沽酒唱歌去
踏碎滿階山杏花

其二

橫塘秋老藕花殘
摘盡蓮房水不寒
驚起鴛鴦不成浴
翩翩飛過白蘋灘

初夏

落盡殘紅日正遲
薰風一夜折薔薇
池塘雨過無人到
滿地榆錢鶯亂啼

病中作

剔盡寒燈夢不成
擁衾危坐到三更
不知何處

吹羌笛落盡梅花月滿城

客中即事

華屋沉沉乳燕飛綠楊深處轉黃鸝
踈簾不捲薰風靜坐看庭花日影移

秋日見蝶

江空木落鴈聲悲霜染丹楓百草萎
蝴蝶不知身是夢又隨秋色上寒枝

虞姬

力盡重瞳霸業消楚歌聲裡恨迢迢
貞魂化作

原頭草不逐東風入漢郊

暮春即事

落花如雪點蒼苔深掩重門晝不開
蝴蝶不知春已去又隨飛絮過牆來

染甲

金盤和露搗晴霞紅透纖纖玉筍芽
翠袖籠香理瑤瑟綠陰新綻海棠花

題劉阮圖

潘氏

千年古木萬年山洞口仙娥自玉顏
劉阮當年

那得見浪傳奇蹟在人間

秋詞

翩翩黃葉落西風月滿池亭秋夜空
萸菊酒香人已醉白蘋江冷度哀鴻

渡錢塘喜晴

王素娥

風微月落早潮平江國新晴喜不勝
試看小舟輕似葉載將山色過西陵

黃昏

堦下蛩吟又暮秋倚闌獨立恨悠悠
幾多心事

三年淚忍向珊瑚枕上流

獨愁

黃昏愁聽雨蕭蕭挑盡殘燈夜寂寥
針綫不拈腸欲斷薰爐香冷火應消

送夫

婁妃

金雞未報五更曉寶馬先嘶十里風
欲借三杯壯行色酒家猶在夢魂中

七夕

陳孺人

靈鵲成橋事有無人間今夜憶仙姑
倚窓坐久

秋聲動一葉西風到碧梧

謝蔣大姐寄鞋

金蓮小辦墮瑤池想像深闈結繡時無限巧心
勞遠寄露多不忍下階墀

詠菊詩

虞氏

虞氏董湄妻也年十六歸湄甫兩月而
湄死父母憐其年少勸之再醮女痛絕
欲死作菊竹二詩見志刻木為夫晨夕
事之年五十而卒稱為節婦云

移得春苗愛護周柴桑無主為誰秋寒芳甘抱
枯枝萎不墜西風逐水流

井上竹

一片貞心古井泉清寒徹骨自堪憐相看歲暮
青青色歷盡冰霜戴一天

桃源洞

潘夫人

桃花開盡幾千重綠水青山映遠空欲向仙家
探消息茫茫古洞白雲封

隨任夜泊晉陵

寒雲薄霧五湖秋風動蘆花蕩客愁遙望家山
何處是青天孤月思悠悠

聞徵瓦氏兵至

孫夫人

傳聞瓦氏勇超羣萬里徵來淨冠氛多少材官
屯海畔策勲翻仗女將軍

閨怨二首

董夫人

嶺南春色正堪悲數盡梅花淚半垂十二玉樓
人別後年年芳草負歸期

其二

素柯蕭瑟海天寬露濕空階夜更寒明月近人
秋已盡滿簾花落帶愁看

雪中憶夫

蕭蕭落木朔風寒獨坐深閨嘆路難等待雪消
春色遍玉蘭花好共誰看

送夫南行

飛花片片逐江流君自南行妾自愁十二欄干
春色淡相思人倚夕陽樓

秋思

梧桐秋色草萋萋幾樹寒蟬向妾啼夢遶雲山
連碧月隨風夜夜到遼西
落盡梧桐葉正飛征人塞外未曾歸庭前已覺
西風冷明月黃昏獨掩扉
每逢搖落不勝愁病起無聊懶上樓月近玉階
寒露滴殘燈相對兩悠悠

寄夫

客路秋風獨掩關愁心飛遶萬重山洞房舉目
雲霄近不見青鸞帶信還

裁衣

芙蓉江北鴈飛飛燕子磯邊人未歸只怕沈郎
腰已瘦遲迴難寄舊時衣

塞上憶家

雲橫紫塞暗天河迢遞邊城不易過遙想故園
歸去路楚江荒草夢魂多

社日懷兄妹

愁來到處聽栖鴉千里關山道路賒村社酒酣
人盡散一家兄妹各天涯

妓

泊濠曲

姜舜玉

芙蓉帶結紅鸂鶒
帶楊柳絲牽燕子飛
獨棹蘭舟何處宿
年年飄泊待郎歸

寄吳郎

王文卿

舊事巫山一夢中
佳期回首竟成空
郎心亦是浮萍草
莫怪楊花易逐風

從良後有舊欲相見
以扇画柳題拒之

林奴兒

昔日章臺舞細腰
任君攀折嫩枝條
如今寫入丹青裏
不許東風再動搖

送舉子赴試

淮安妓

淮草青青淮水渾
安排輕櫓送王孫
明年三月桃花發
君聽傳臚妾倚門

羽士

夢遊仙

周思得

山中瑤草應無種
洞口桃花別有春
一局殘棋天地老
武陵溪上不逢人

其二

仙人醉卧碧岩秋
白日倒挂岩西頭
猛虎一聲驚不醒
西風吹夢落瀛洲

春曉

張無為

弱柳搖烟落絮輕
綠陰初長小池平
杜鵑處處催春急
不是東風太薄情

閒居

盧大雅

幾樹垂楊曲澗迴
啣泥飛鷺去還來
荆扉書掩人聲寂
片片落花霑碧苔

韓臺阻雨

趙龍山

韓臺南望碧嵯峨
滹水平添一丈波
渡口行人休便過
西山大雨正滂沱

釋

西湖

來復

芙蓉灣口綠陰斜
吹笛何人隔彩霞
驚起沙頭雙翠鳥
銜魚飛上刺桐花

過孫山人故居

溪邊野竹映寒沙
茆屋青山處士家
燕子歸來

寒食雨春風開遍野棠花

偶作

宗泐

竹外茅齋椽下亭半池蓮葉半池菱匡牀曲几
坐終日萬疊青山一老僧

寄東軒

黃菊初開白露零淮河水落暮山青一聲鴈度
秋雲冷坐到黃昏月滿庭

遊東山

懷海

雨餘徐步碧苔新老樹雲封認不真莫道東山

大寥廓年年不盡廣陵春

煉丹臺

白石蒼苔路不分頽霞紫霧晝氤氳爐中烟火
渾無氣都入蓬萊一片雲

磨劍石

江頭片石星霜老古昔曾經礪太阿可惜英雄
收不去年年風雨倩人磨

仙女洞

地骨鑿開雲屋冷阿姑曾此絕風塵自從月下

鞭鸞去瑤草空餘洞口春

訪張佩之不遇

魯山

幾度尋君不見君門前高樹掛斜曛踏春馬向
誰家去一鳥空啼滿地雲

寄王宗器

松下思君獨杖藜隴山遙望眼中迷書成欲付
霜前鴈却恨南飛不向西

送馬公順

蘆溝南去路悠悠十月花冰拍岸流翹首太行

山上月又從今夜照離愁

榆城聽角

天祥

十年游子在天涯一夜秋風又憶家恨殺葉榆
城上角曉來吹入小梅花

遊白塔次伯溫劉先生韻

夢觀

春草禪扃路欲迷白頭感慨故宮西鐘聲送盡
寒潮水月落冬青杜宇啼

題黃鶴樓圖

仙樓縹緲隔蓬萊黃鶴西飛竟不回倚遍闌干

秋水濶征帆一葉漢陽來

水仙

露瀉金盃玉液新凌波誰賦襪生塵建安才子
風流遠空向山陰寫洛神

明皇小車圖

守仁

宮門日出乳鴉啼仙漏沉沉樹影低朝罷千官
無一事車聲又過壽陽西

鄭山人至

方澤

別後翩翩幾處遊馬蹄強半在皇州六街笙鼓
閒相聒可似青山一榻幽

贈天台陳茂才

笑指天台是爾家衣裳猶帶赤城霞連宵醉卧
諸侯榻歸去應迷玉洞花

送人還壺關

嬾雲

林花未吐怯輕寒人在天涯送客還千里好山
迎馬首白雲飛處是壺關

靈巖寺

志西

路入烟霞石作梯林深香自襲人衣鳥啼花外

山房靜風起開門僧未歸

桃源塢與羽士泛舟

果斌

十里平湖落彩霞樹中樓閣即仙家扁舟更入
桃源去應有春波帶落花

王十嶽金平淵山寮避暑

小隱空山絕四鄰野雲孤鶴自相親誰知一迳
采如許猶有敲門看竹人

青衣

十月京師紀事

李英

蕭關風急馬頻嘶四塞河山動鼓鼙獨立高臺
望烽火胡笳多在薊門西

寄遠

谷淮

瓊花臺上雨初收黃歇山前水急流莫道別來
鄉國異南江愁是北江愁

病中

一負成病竟年年愁入蒼茫歲暮天客至擁衾

聊起坐冷風吹雨到牀前

明詩正聲後序

夫詩自漢魏而降靡於六朝
自唐而振亦自唐斬斯道不
講蓋歷數世惟我

明興作者輩出雲蒸霞燦朗若
日星即與貞觀大曆諸君子

並駕齊馳未云少讓噫詩果
何物哉詩者志之所之也在
心為志發言為詩可以懲創
可以感發可以觀風化可以
卜興衰可通天地可格鬼神
詩其神矣哉古云詩匪作之
難知之惟難顧余猥謏荒弛
間亦嘗問陳隋之故墟探燕
趙之陳迹因時述志觸事感
懷發之吟咏要皆未識谿徑
敢云知詩歲在己丑子明廬
山人歸自秣陵訪伯兄孟化

仲兄仲翀暨不肖於海上出示所選明詩若干卷題曰正聲與兩兄互有去取謀付諸梓柰何讀未卒業而兩兄繼逝子明亦遊於越明年復來持示余曰茲非爾兩兄未竟之志耶余拜受而讀之即授諸剖厥氏請序大廷尉陳公馬子明所輯誠如陳公云云余烏容以置喙第海內之士各建旗鼓自立門戶毋論製

卜至庭即所選輯亦人人殊

務精者失之苛喜博者失於
濫論甘而忌辛好丹而非素
又何取於正聲哉嗚呼貴遠
賤近重耳輕目世道類爾然
識者亦能鑒之是集也采及
愚兄弟父子之言不免駭駑
駘於上駟亂瓦礫於琳瑯子
明其謂我何未有餘木聊贅
以紀歲月云

萬曆辛卯仲夏廣陵江一夔
撰





卷一

四

